

Esperanto kaj la fondo de la internacia organizo WCA por Vikipedio-verkantoj

„Wikimedia Österreich“ (asocio de aŭstria Vikipedio-verkantoj) fondis kun multaj aliaj Vikipedianoj (Germanio, Svislando, Ĉilio,...) la organizon Wikimedia Chapters Association (WCA). Oficiala decido de la fond-renkontiĝo estis: „Surbaze de la multlingveco de nia movado la komitato publikigos siajn decidojn en Esperanto por subteni la tradukadon al aliaj lingvoj“.

(http://meta.wikimedia.org/wiki/Wikimedia_Chapters_Association/Establishment_of_the_Chapter_Council_Steering_Committee/eo),
Yahoo-grupo aŭstraj esperantistoj

UEA en konsulta partnereco kun Unesko

Universala Esperanto-Asocio fariĝis konsulta partnero de Unesko, la Organizo de UN por Edukado, Scienco kaj Kulturo. Tiel decidis la Ĝenerala Direktoro de Unesko, s-ino Irina Bokova, konforme al la novaj gvidlinioj pri la rilatoj de Unesko kun Ne-Registaraj Organizaĵoj (NRO-j), kiujn la Ĝenerala Konferenco adoptis en Novembro. Fakte, laŭ la novaj gvidlinioj ne plu temas pri rilatoj sed pri partnereco por pli bone esprimi, ke Unesko celas kunlabori kun NRO-j por la komunaj celoj kaj ne nur formale rilati kun ili. Por Unesko NRO-j estas gravaj, ĉar pere de ili ĝi rekte atingas la civilan socion preter la ŝtataj strukturoj.

Gazetaraj Komunikoj de UEA

Internacia Virina Tago 2012 en Hiroŝimo

Taeko Osioka de la Hirosima Esperanto-Centro raportas, ke la plenuma komitato de la Internacia Virina Tago 2012 en Hiroŝimo ricevis 235 mesaĝojn el 65 landoj kaj teritorioj. Ekzemple el Francio 50, el Germanio 13 kaj el Aŭstrio 3. Oni ekspoziciis la mesaĝojn ĉe 3 urbaj kunvenejoj dum 3 semajnoj.

osioka@mua.biglobe.ne.jp

Esperanto-radio por Androidaj telefonoj

Pli kaj pli da homoj uzas la plur-funkciajn telefonojn kaj tabulkomputilojn, funkciantajn per la operacia sistemo Android. Aperis senpage aplikaĵo „Esperanto-radio Muzaiko“ por Androidaj aparatoj, kiu ebligas aŭskultadon de pli ol 10 Esperantaj radio-kanaloj. Memkompreneble ankaŭ aŭdeblas la tuttempa Muzaiko, kiu festis sian unujariĝon en Aprilo kun specialaj programeroj. La radioaplikaĵo multe simpligas la aŭskultadon de radioelsendoj: la telefono estas ĉiam ĉemane kaj sufiĉas nur premo de butono por ekaŭskulti radion. La programo estas senpage elŝutebla el la Androida Bazar. Serĉu la vorton: „Muzaiko“, retumu al <https://market.android.com/details?id=dk.nordfalk.esperanto.radio>.

Du novaj senpagaj e-libroj de Tolstoj

En la kolekto de elektronikaj libroj (e-libroj) de Sezonoj aperis du faksimilaj libroj de Lev Tolstoj, eldonitaj antaŭ 100 jaroj, nome en 1912 kadre de la serio Tutmonda Biblioteko je la memoro de L. Tolstoj. Ambaŭ libroj estas senpage elŝuteblaj en la retejo:

<http://esperanto.org/Ondo/Libroj/Libro.php>, en kiu nun estas 13 senpagaj e-libroj kaj unu aĉetebla e-libro.

La Ondo

UEA retenis la membronombro

Laŭ la oficiala statistiko, aperinta en la Aprila numero de la revuo *Esperanto*, en 2011 Universala Esperanto-Asocio (UEA) havis 5321 individuajn membrojn en 118 landoj, t.e. je 33 pli ol en 2010. La pinto de 12 landoj konsistis ekz. el Francio (534; -13), Germanio (502; -4); Brazilo (385; +11) kaj Rusio (144; +56). Iom malkreskis la nombro de aligitaj membroj, t.e. tiuj membroj de la landaj asocioj, kiuj ne estas samtempe individuaj membroj de UEA. Ili nombris 10 480 (-47). Sur la unua loko estis Ĉinio

kun 1051. Por pli ol 300 aligitaj membroj pagis ekzemple Japanio (908; +7), Pollando (750; +50), Germanio (653; -18), Kroatio (398; +139) kaj Usono (386; -102). La tuta UEA-membraro, kiu konsistas el la individuaj kaj aligitaj membroj kune, estis pasintjare 15801 (-14). Malpli ol 30-jaraj estis 373 individuaj membroj, kiuj do samtempe estis individuaj membroj de la junulara sekcio TEJO (+49). Krome, 1714 el la aligitaj membroj estis malpli ol 30-jaraj (-20), tiel ke TEJO havis entute 2087 membrojn (+29).

Gazetaraj Komunikoj de UEA


35-a Esperantologia konferenco en Hanojo

Esperantologia Konferenco estas jam tradicia programero de la Universala Kongreso de Esperanto. Ĝin organizas la Centro de Esploro kaj Dokumentado pri Mondaj Lingvaj Problemoj (CED) kaj ĝi okazis unuafoje en Varno en 1978. La 35-an sesion en Hanojo en Aŭgusto gvidos prof. Kiselman kun Mélanie Maradan. La programo antaŭvidas kvin prelegojn. La prelegoj estos poste publikigitaj kiel aktoj ĉe la Libro servo de UEA. Aktoj de pluraj antaŭaj Esperantologiaj Konferencoj estas ankoraŭ haveblaj.

Gazetaraj Komunikoj de UEA

PIV aperis en la reto

En 2010 komenciĝis monkolekta kampanjo por enretigo de *Plena Ilustrita*



Vortaro de Esperanto. La eldoninto de la vortaro Sennacieca Asocio Tutmonda kaj la organizaĵo E@I interkonsentis pri la projekto, kiu donu al ĉiuj dezirantoj senpagan retan aliron al la tuta enhavo de la vortaro, kaj samtempe ebligos retan administradon de la datumaro. Post plurjara laboro aperis nun la reta versio de la fama vortaro. Necesas nur registriĝi, la servo mem estas senpaga.

www.vortaro.net

Rilate al la Google-tradukilo FBI atentigas pri Esperanto

Februare aperis en la oficiala blogo de la servo Google-tradukilo novaĵo pri tio, ke ekde nun oni povas per ĝi traduki ankaŭ al aŭ de Esperanto. Malgraŭ tio, ke por Esperanto la maŝino ne havis multe da trejnmaterialo kaj la tradukado okazas pere de la angla, la kvalito de la Esperantaj tradukoj estas laŭ Google superaveraĝa kaj oni povas supozi, ke en la estonteco ĝi ankoraŭ pliboniĝos, ĉar la uzantoj povas korekti erarojn kaj tiel kontribui per pli bonaj tradukoj. Eĉ FBI-retpaŝaro uzas Esperanto-lingvan frazon por atentigi pri la nova ebleco uzi Google-tradukilon en sia retejo: „As Esperanto speakers might say, estas malgranda mondo finfine...it's a small world after all.“

http://www.fbi.gov/news/news_blog/translation_040512

Unuaj eĥoj pri la popol-iniciato rilate Eŭropan Himnon

Eŭropa Esperanto-Unio (EEU) lanĉis „civitanan proponon“, kio eblas ekde la 1a de Aprilo, nome kanti la Eŭropan himnon en Esperanto. Kiel konate, ne ekzistas teksto por la himno, nur melodio. Umberto Broccatelli kreis tekston en Esperanto (<http://ec.europa.eu>). Gazetara komunikado legeblas interalie de GEA (www.esperanto.de/presse/aktuelles/index.html). Venis nun unuaj eĥoj en la gazetaro, ekzemple: www.europeonline-magazine.eu/erste-eu-buergerinitiative-europa-hymne-auf-esperanto_202704.html

La unua intervjuo de la nova prezidanto de la plenumkomitato de SAT

La 17an de marto la 29-jara natursciencisto Vinko Markovo el Tübingen estis elektita kiel prezidanto de la plenumkomitato de Sennacieca Asocio Tutmonda (SAT), la tutmonda, neneŭtrala kaj sendependa organizo de laboristaj esperantistoj. Li respondis kelkajn demandojn de *La Ondo de Esperanto*. La teksto de la intervjuo, aperinta en la Maja kajero de *La Ondo de Esperanto*, estas ankaŭ legebla en la reto

<http://sezonoj.ru/2012/04/kamarado-prezidanto-respondas/>

Ĝemelurba agado de UEA 10-jariĝis

Kontaktoj inter ĝemelaj urboj, precipe inter la Esperanto-klubo kaj individuaj Esperantistoj, okazas jam de tre longe, sed en 2002 Universala Esperanto-Asocio elektis komisiiton por kunordigi la agadon kaj prizorgi informfluan kaj spertinterŝanĝon en tiu kampo. Tiun taskon akceptis la ĉina aktivulo Wu Guojiang. En la 40-a numero de Informilo pri Ĝemelaj Urboj troviĝas multaj gratulmesaĝoj kaj rememoroj el la tuta mondo, kun informoj kaj ekzemploj pri la farita laboro. La tuta kolekto de la informilo estas elŝutebla en interreto, kie eblas facile serĉi menciojn pri unuopaj urboj, personoj ktp.

Gazetaraj Komunikoj de UEA,
www.uea.org

Pli ol 500 Esperanto-lernantoj en Sicilio

Bone disvolviĝas la projekto pri establo de la Internacia Centro de Interkulturo en Mediteraneo en Sicilia urbo Mazara del Vallo (Mazaradelvalo). Ekde januaro 2012 Esperanto estas instruata en deko da lernejoj, du liceoj (sciencia kaj arta), al instruistaro de la urbo kaj al oficistoj de la urbodomo. Pli ol 500 personoj lernas nun la internacian lingvon en la urbeto.

<http://sezonoj.ru/2012/05/212sicilio/>



Historio, nuno kaj estonto en la Aprila Malferma Tago

D-ro Ulrich Lins estis la ĉefa preleganto en la 36-a Malferma Tago de la Centra Oficejo (CO) de Universala Esperanto-Asocio (UEA) en Aprilo. La aranĝo allogis 85 vizitantojn kaj okazis precize 50 jarojn post la translokiĝo de la oficejo al la domo ĉe Nieuwe Binnenweg. D-ro Lins prelegis dufoje pri personoj, kiujn li renkontis dum siaj vizitoj, kaj pri movadaj eventoj, ligitaj al la CO. La prezidanto de Eŭropa Esperanto-Unio, Seán O'Riain, parolis pri la civitana iniciato por la kantado de la Eŭropa Himno en Esperanto. Flory Witdoeckt vivigis la prelegon kantante la himnon kun la vortoj de Umberto Broccatelli. Lige kun la kunsido de la Estraro de UEA ĉeestis ankaŭ reprezentantoj de la Tutmonda Esperantista Junulara Organizo (TEJO) kaj de la Internacia Ligo de Esperantistaj Instruistoj (ILEI). La sekva Malferma Tago estos Sabaton, la 24-an de Novembro 2012.

Gazetaraj Komunikoj de UEA

Novaj Komitatanoj B de TEJO

Paweł Fischer-Kotowski el Pollando, Wang Shanshan el Ĉinio, Ronald Baby González el Kubo/Hispanio kaj Magnus Henoch el Svedio/Britio estas novaj Komitatanoj B de la Tutmonda Esperantista Junulara Organizo (TEJO). Ili estis elektitaj per balotado de Individuaj Membroj de TEJO okazinta Marte kaj Aprile, kaj oficos de Junio 2012 ĝis Majo 2014. La komitatanoj reprezentas la individuajn membrojn de TEJO

www.tejo.org/eo/node/1443

Kolektis kaj prilaboris Uwe Stecher